


... Aruba Dushi Tera ...

E STEELBAND

E musica cu ta trece ambiente den Carnaval ta e musica di "brass-band", cu a haya e nomber di asambeho". Pero e musica cu a lanta pareu cu nos Carnaval a cuminsa crece, ta di "steel-band". Un ritmo dushi cu zonido suave y cu ta dunabo pep pa baila den Carnaval.



Aki Ernest Richardson (†) ta stem e 'pan' y Craig Hutchinson (†) ta scucha si e zonido ta bon.

(Foto cortesía Archivo Histórico Nacional)

E steelband ta originalmente di Trinidad cu ta mescos cu Aruba, un isla di Carnaval.

E prome grupo a lanta na 1945 bao di Sr. Lennard Turner, conocí como Shu-shu-baby. Nan a usa drumnan cu ta trahá di un simpel barí di azeta, cu nan tabata haya for di Lago. Tur ta




Esaki ta Jumping Jewels Steelband na aña 1970-1971 (Foto cortesía Sr. Jossy Laclé)

duna un man, y e barínan tabata wordo cortá, pintá, keintá, bati y finalmente ge-stem.

Henter e proceso pa traha un "pan" ta dura varios siman y semper bao guia di un persona cu experiencia. Awendia e pan-nan ta wordo busca for di Trinidad of for di un fabrica na Ohio "Panyard".

Y tecnologia a haci un "pan" un instrumento costoso, pero unico.

Antes un steelband tabata baha na pia den parada. Nan tabata colga e drumnan chikito cu un faha rond di nan nek y e drumnan grandi tabata bai riba wiel den parada. Despues nan tabata



traha un sorto di "trailer" di tubo y cada drum tabata haya un lugar fiho. Asina e tocador no mester carga e drum pisa durante e ruta largo di parada.

Un steelband na pia tin 6 diferente drums y cada un ta produci un otro zonido. Un steel-orchestra ta toca riba "stage" y tin un extra drum, e "double first pan".

E "first pan" di un steelband tin por lo menos 25 diferente tono y semper ta bai na cabez di e grupo. Por tin mas cu un "first pan" den e grupo. E drum aki ta saca e melodia y e restonan ta compañ'é.

E promé steelband tabata Antillean Stars cu despues a cambia bira Antilles Steel Orchestra. E pioneronan tabata Naldo Brown, Edgar y Paul Connor, Vincent Bacchus, Lord Boxoe kende a forma "Black Diamonds" y Dennis Jones.

Prome cu 1960 Steelband tabata di San Nicolas. Fuera di esnan ya mencioná tabata tin tambe Aruba Invaders, All Stars, Silver Stars, y Viceroy. Tur di San Nicolas.

Entre 60 y 70 e fiebre di steelband a plama tur rond di Aruba.

Ronny Kock a lanta Jumping Jewels na Savaneta. Red Stars di Oranjestad formá pa Mario y Milo Arends, Padu Werleman cu Sta. Cruz Stars, Jaño Tromp cu Tanki Flip Stars, Jossy Laclé cu Paradera Indians, Buchi Boekhoudt cu Twinkling Stars, Rudy Yarzagaray cu Sunny Isle Steelband, Broadbelt cu Tarabana Stars y Monchi Danies cu Tanki Leendert Steelband.

Mester menciona tambe Bayan cu su Weg Fontein Stars y

Martin Quandus kende a lanta Seroe Janchi Stars, despues Noord Stars, y e conocido musico Francis Jacobs cu tambe tin su steelband. Esakinan tabata e ultimonan cu a keda existi y por a mira ainda den parada algun aña pasá.

E bunita ta, cu e pioneronan a yuda lanta e otro steelbandnan. Awor varios di nan ya no tey mas.

Pero tin dos ex-tocador Arubiano, esta Ronny Kock y Jossy Laclé, kendenan recientemente a bishitá Trinidad. Nan tin hopi conocimiento di e musica y e instrumento. Nan por pasa esaki pa e generacion cu ta lanta. Asina nos por rebibá e musica dushi di steelband y engrandecé nos Carnaval...


Un danki special na: Sres. Samuel Hodge, Jossy Lacle, Mario Arends y Yubi Naar

ICH



Chabalito

Number 5 - Año III - Januari, 2001 - Afl. 2,=



Ban bishita Rio de Janeiro! • Conoce mas di Aruba! • Nos deportistanan! • Premio!